

1 PEDRO

¹ Pedrojon, apóstolon i cha'an Jesucristo. Mic ts'ijbubeñetla ili jun, xñumelet jach b_Λ la, pu-jquemet b_Λ la ti Ponto, ti Galacia, ti Capadocia, ti Asia yic'ot ti Bitinia.

² Yajc_Λbiletla che' bajche' tsi' w_Λn ña'ta Dios lac Tat. Jini Espíritu woli' s_Λq'uesañetla cha'an mi la' jac'ben Jesucristo, yic'ot ja'el cha'an mi la' mujlel ti' ch'ich'el Jesucristo. La' p'ojles_Λntic i yutslel yic'ot i ñach't_Λlel la' pusic'al.

An cuxul b_Λ lac pijtaya

³ La' subjic i ñucel Dios i Tat lac Yum Jesucristo, come cab_Λl tsi' p'untayonla che' b_Λ tsi' y_Λq'ueyonla lac cha' ilan pañimil. Jini cha'an an cuxul b_Λ lac pijtaya, cha'an tsa' cha' tejchi ch'ojyel Jesucristo ba'an ch_Λmeño' b_Λ.

⁴ Come Dios mi caj i y_Λq'ueñonla jini lotbebilon b_Λ la ti panchan ba' ma'anic mi' jilel, ba' ma'anic mi' bib'an, ma'anic mi' tsuculiyel. Mi caj la' w_Λq'uentel ya' ti panchan.

⁵ Come Dios woli' c_Λntañetla ti ñuc b_Λ i p'_Λt_Λlel pejteletla mu' b_Λ la' ñop, c'_Λl_Λl ti jini cojix b_Λ q'uin che' mi caj i tsictiyel la' colt_Λntel tsa' b_Λ i w_Λn chajp_Λbeyetla.

⁶ Jini cha'an tijicñayetla, anquese poj jumuc' jach mi la' wubin jujunchajp wocol mi che'_Λch yom Dios,

⁷ cha'an mi' tsictiyel mi xuc'ul woli la' ñop. Ñumen uts'at i xuc't_Λlel la' pusic'al ti Cristo bajche' oro mu' b_Λ i jilel. Wolix la' ñusan wocol che' bajche'

mi' ñumel oro ti c'ajc cha'an mi' q'uejlel mi mero oro. Che' ja'el che' ñumenix la' wocol, mi caj i sujbel la' ñuclel, mi caj la' c'uxbintel, mi caj la' q'uejlel ti ñuc che' mi' tsictiyel Jesucristo.

⁸ Ma'anic tsa' la' q'uele Jesús, pero mi la' c'uxbin. Ma'anic woli la' q'uel w_Λle, pero woli la' ñop. Jini cha'an ma'anic i p'isol i tijicñ_Λyel la' pusic'al tilem b_Λ ti panchan,

⁹ come woli la' taj la' colt_Λntel cha'an tsa' la' ñopo.

¹⁰ Che' bajche' tsi' w_Λn subuyob jini x'alt'añob, mi caj la' taj i yutsllel i pusic'al Dios. Tsi' ñopoyob i ch'_Λmben isujm bajche' mi caj i yujtel la' colt_Λntel.

¹¹ Tsi' sajca'yob ti jun cha'an mi' ña'tañob baqui b_Λ ora mi' caj ti ujtel jini tsa' b_Λ i y_Λl i yEspíritu Cristo am b_Λ ti' pusic'alob. Come i yEspíritu Cristo tsi' w_Λn subeyob i wocol Cristo, yic'ot i ñuclel mu' b_Λ caj i taj che' ujtemix wocol.

¹² Tsa' p_Λs Bentleyob mach cha'anic i bajñel c'_Λjñibal tsi' cha'leyob t'an, pero cha'an mi' c_Λntes_Λntel yaño' b_Λ. W_Λle tsa'ix la' wubi jini jach b_Λ t'an tic tojlel lojon. Tsac subeyetla jini wen t'an yic'ot jini Ch'ujul b_Λ Espiritu chochil b_Λ tilel ti panchan. Jini ángelob wersa yomob i ch'_Λmben isujm.

Yom ch'ujuletla ti pejtelel la' melbal

¹³ Jini cha'an, chajpan la' pusic'al. Yom y_Λx_Λl la' wo. Junyajlel xuc'chocon la' b_Λ ti pijtaya, come mi caj la' w_Λq'uentel i yutsllel la' pusic'al che' mi' p_Λstal Jesucristo.

¹⁴ Yom lajaletla bajche' alobob mu' b_Λ i wen jac'ob t'an. Mach mi la' ch_Λn mel che' bajche' ti

yamb_Λ ora che' maxto anic la' ña't_Λbal, che' b_Λ tsa' la' jac'_Λ i colosojlel la' pusic'al.

15 Ch'ujul jini tsa' b_Λ i p_Λy_Λyetla, jini cha'an yom ch'ujuletla ja'el ti pejtelel la' melbal.

16 Come ts'ijbubil: “Ajñenla ti ch'ujul, come ch'ujulon”, che'en lac Yum.

17 Mi woli la' pejcan ti la' Tat jini mu' b_Λ i mel pejt_Λel winicob ti toj, mu' b_Λ caj i meletla ti jujuntiquil che' bajche' an la' melbal, ajñenla ti b_Λq'uen che' w_Λ'to añetla ba' mach mero la' lumalic.

18 Come ña't_Λbil la' cha'an, m_Λmbiletla cha'an ma'anic mi la' ch_Λn ñop jini lolom jach b_Λ tsa' b_Λ la' ñopo ti la' ñojte'el. Mach m_Λmbileticla ti jini yujil tac b_Λ jilel che' bajche' oro yic'ot s_Λs_Λc taq'uin.

19 Pero m_Λmbiletla ti' ch'ich'el Cristo, letsem b_Λ i tojol, che' bajche' juncojt a_Λ tat tiñame' mach b_Λ anic i ch_Λmel mi i bibi'lel.

20 Tsa' wa'choconti Jesús che' maxto anic tsa' mejli pañimil, pero tsa' poj tsictiyi ti jini cojix b_Λ q'uin tac am b_Λ w_Λle cha'an mi' coltañetla.

21 Cha'an ti' caj Jesús mi la' ñop Dios tsa' b_Λ i teche ch'ojoyel Jesús ba'an ch_Λmeño' b_Λ. Tsi' y_Λq'ue i ñucl_Λel. Jini cha'an c_Λy_Λletla ti Dios. An la' pijtaya ti Dios.

22 Tsa'ix la' s_Λq'uesa la' pusic'al ti' jac'ol i sujml_Λel. Jini cha'an mi la' c'uxbin la' wermanojob ti isujm. Wen c'uxbin la' b_Λ ti jump'ejl la' pusic'al.

23 Come ma'anic tsa' la' cha' ila pañimil ti pac' yujil b_Λ jilel, pero ti pac' mach b_Λ yujilic jilel, jini cuxul b_Λ i t'an Dios mu' b_Λ i yajñel ti pejtelel ora.

24 Come ts'ijbubil: “Pejtelel winicob lajalob bajche' pimel. Pejtelel i ñucl_Λel winicob lajal_Λch bajche' i nich pimel. Mi' tiquin pimel, mi' yajlel jubel

i nich,

²⁵ pero i t'an lac Yum mi' yajñel ti pejtelel ora”, che'en. Che'ach mi' yal jini wen t'an tsa' bΛ c subeyetla.

2

¹ Jini cha'an cΛyΛla pejtelel la' jontolil yic'ot lotiya yic'ot i cha'chajplel la' pusic'al, yic'ot tsΛytsΛyña bΛ la' pusic'al cha'an i wenlel la' pi'Λlob, yic'ot pejtelel u'yaj t'an.

² Yom lajaletla bajche' alΛl, poj ujtℓ bΛ i yilan pañimil, mu' bΛ i c'ajtin i chu'. Che'ach yom mi la' c'ajtin la' chu' ti Espíritu mu' bΛ i we'san la' pusic'al ti' sujmlℓ, cha'an mi la' colel majlel ti la' coltΛntℓ,

³ mi sumuc tsa' la' wubi i yutslℓ lac Yum.

Jini cuxul bΛ Xajlel

⁴ La'la ba'an Jesús, jini cuxul bΛ Xajlel. Winicob tsi' chocoyob ti isujm, pero Dios tsi' yajca come uts'atax mi' q'uel.

⁵ Jatetla ja'el lajaletla bajche' cuxul bΛ xajlel. Woli la' wa'chocontℓ ti' yotot Dios. Yom ch'ujul bΛ motomajetla i cha'an Jesucristo cha'an mi la' wΛq'uen ch'ujul bΛ i majtan Dios mu' bΛ i mulan.

⁶ Come ts'ijbubil: “Awilan, woli cΛc' ti Sion jump'ejl uts'at bΛ Xajlel, yajcΛbil bΛ cha'an i xujc otot. Jini mu' bΛ i ñop ma'anic mi' cajel ti quisin”, che'en.

⁷ Jatetla mu' bΛ la' ñop, c'ux mi la' wubin Jesús. Pero ti' tojlel jini mach bΛ anic mi' ñopob, jiñach Xajlel chocbil bΛ cha'an jini xmel ototob. Pero Dios tsi' yotsa ti' xujc otot.

8 Ts'ijbubil ja'el: “Jiñach Xajlel ba' mi' jats'ob i yoc winicob. Jiñach Ñuc bΛ Xajlel mu' bΛ i yΛc'ob ti yajlel. Come tsi' jats'ayob i yoc cha'an ma'anic tsi' jac'ayob jini wen t'an”. Che'ach tsi' meleyob bajche' tsi' wΛn ña'ta Dios.

X'e'teletla i cha'an Dios

9 Pero i yalobiletla, yajcΛbiletla. Ñuc bΛ motomajetla ti' tojlel jini Rey. Ch'ujul bΛ tejclumetla. I cha'añetla Dios cha'an mi la' sub majlel jini ñuc tac bΛ i melbal Dios, tsa' bΛ i pΛyΛyetla loq'uel ti ic'yoch'an bΛ pañimil. Tsi' yotsayetla ti' saclel i yumΛntel.

10 Ti yambΛ ora mach i cha'añeticla Dios, pero wΛle i cha'añetla. Ti yambΛ ora ma'anic majch tsi' p'untayetla, pero wΛle tsa'ix i p'untayetla.

11 C'uxbibilet bΛ la, xñumeletla ti pañimil, yañach bΛ la' lumal. Ti wocol t'an mic subeñetla mach yomic mi la' jac'ben i colosojlel la' pusic'al mu' bΛ i cha'len guerra ti' contra la' ch'ujlel.

12 PΛsΛ la' bΛ ti uts'at ti' tojlel jini gentilob. Che' jini anquese mi' pΛq'uetla ti jontolil, mi caj i ña'tañob wen bΛ la' melbal che' mi' tsictiyel lac melbal ti lac pejtelel. Mi caj i subob i ñuclel Dios.

Ac'Λ la' bΛ ti' wenta año' bΛ i ye'tel

13 Añetla ti lac Yum, jini cha'an ac'Λ la' bΛ ti uts'at ti' wenta pejtelel año' bΛ i ye'tel ti la' tojlel, jini c'ax ñuc bΛ yumΛ

14 yic'ot winicob wa'chocobilo' bΛ i cha'an, cha'an mi' yΛq'ueñob i toj i mul xjontolilob, yic'ot cha'an mi' subeñob i ñuclel jini mu' bΛ i melob chuqui wen.

15 Come yom Dios mi la' mel chuqui wen cha'an mi la' ñach'tesabeñob i tontojlel jini winicob mach b_Λ añobic i ña't_Λbal.

16 Libre añetla cha'an mi la' mel chuqui uts'at, mach cha'anic mi la' cha'len mulil, come x'e'teletla i cha'an Dios.

17 Q'uelela ti ñuc pejtelel winicob x'ixicob. C'uxbin la' wermanojob. B_Λc'ñanla Dios. Q'uelela ti ñuc jini yum_Λlob.

18 X'e'telob, jac'benla i t'an la' yum, mach cojic jach jini uts'ato' b_Λ mu' b_Λ i c'uxbiñetla pero jini ts_Λtso' b_Λ i t'an ja'el.

19 Come uts'at mi' q'uelonla Dios mi uts'at mi laj cuch wocol che' tic'bilonla cha'an i melol chuqui uts'at, che' ma'anic lac mul.

20 Mi woli la' jajts'el cha'an la' jontolil, ¿am ba la' ñucllel che' mi la' cuch jini wocol? Pero mi woli la' cuch wocol cha'an i melol chuqui uts'at, Dios mi caj i q'ueletla ti uts'at.

21 Come p_Λy_Λbiletla cha'an mi la' wubin wocol. Come Cristo ja'el tsi' yubi wocol cha'añonla. Tsi' p_Λs_Λbeyonla bajche' yom mi lac mel. Tsajcanla majlel.

22 Ma'anic tsi' cha'le mulil, ma'anic tsi' cha'le lot.

23 Che' b_Λ tsa' a'lenti, ma'anic tsi' q'uexta a'leya. Che' b_Λ tsa' aq'uenti wocol, ma'anic tsi' cha'le b_Λc'tesaya. Che' jach tsi' y_Λc'Λ i b_Λ ti' wenta jini mu' b_Λ i cha'len meloñel ti toj.

24 I bajñel jach tsi' cuchu lac mul ti' b_Λc'tal che' b_Λ tsa' ch_Λmi ti te', cha'an mi' jilel i p'Λ_Λlel mulil ti lac tojlel. Cuxulonixla cha'an yom mi lac mel chuqui toj. Lajmes_Λbiletla cha'an tsa' lojwi lac Yum.

25 Ti yamb_Λ ora tsa' sajtiyetla che' bajche'

tiñame', pero tsa' la' sutq'ui la' b_Λ cha'an mi la' tsajcan majlel jini Xcanta tiñame', jini Xcanta mu' b_Λ i coltan la' ch'ujlel.

3

Ajñenla ti uts'at yic'ot la' pi'al

¹ X'ixicob, yom mi la' w_Λc' la' b_Λ ti uts'at ti' wenta la' ñoxi'al. Che' jini, mi ma'anic mi' ñopob la' ñoxi'al, mi caj i ñopob cha'an uts'at b_Λ la' melbal, mach cha'anic la' t'an.

² Mi caj i q'uelob toj b_Λ la' melbal che' mi la' jac'beñob ti uts'at.

³ Mach mero la' ch'ajlilic che' mi la' jal la' jol mi che' mi la' ch'al la' b_Λ ti oro yic'ot wen b_Λ la' pislel.

⁴ Pero yom i ch'ajlil la' pusic'al mach b_Λ anic mi' jilel, jiñach i yutslel yic'ot i ñach'talel la' pusic'al. Jiñach c'ax uts'at b_Λ ti' wut Dios.

⁵ Come che' ja'el ti oñiyi jini ch'ujul b_Λ x'ixicob tsa' b_Λ i pijtayob i wenlel ti Dios tsi' ch'alayob i b_Λ ja'el. Tsi' y_Λc'ayob i b_Λ ti uts'at ti' wenta i ñoxi'al.

⁶ Che'ach tsi' mele Sara. Tsi' ch'ujbibe i t'an Abraham, tsi' pejca ti' yum. Jatetla i yalobiletla Sara, mi toj mi la' mel, mi ma'anic mi la' b_Λc'ñan chuqui mi' yujtel.

⁷ Che' ja'el winicob, ajñenla ti uts'at yic'ot la' wijñam. Q'uelela ti ñuc jini x'ixic anquese ñumen c'un bajche'etla, pero temel mi la' w_Λq'uentel la' cuxtalel ti' yutslel i pusic'al Dios. Che'ach yom mi la' mel ame m_Λc'antic la' woración.

La' wocol cha'an wen b_Λ la' melbal

⁸ Ti pejteletla yom junlajal la' pusic'al mi la' cha'len p'untaya. C'uxbin la' b_Λ che' bajche' la'

wijts'in la' b_Λ. Yom uts la' pusic'al. Yom mi la' mel la' b_Λ ti pec'.

⁹ Mach yomic mi la' q'uextan jontolil, mi a'leya. Yom mi la' w_Λq'ueñob i yutslal la' t'an la' pi'Λlob, come ña't_Λabil la' cha'an p_Λybiletla cha'an mi la' w_Λq'uentel la' wenlel.

¹⁰ Come ts'ijbubil: “Majqui yom ajñel ti' ti-jicñ_Λayel i pusic'al, cha'an uts'at mi' ñusan q'uin, la' i tic' i yac' ti jontolil, la' i tic' i yej ti lot.

¹¹ La' i c_Λy jontolil. La' i mel chuqui uts'at. La' i s_Λclan i wenlel i pi'Λlob cha'an ñ_Λch'Λl mi' yajñel yic'otob.

¹² Come lac Yum woli' wen q'uel jini tojo' b_Λ. Mi' yubibeñob i yoración. Pero mi' contrajin jini mu' b_Λ i melob jontolil”.

¹³ Mi b_Λxetla ti' melol chuqui uts'at, ¿am ba majqui mi caj i tic'lañetla?

¹⁴ Pero mi woli la' tic'Λantel cha'an ti' melol chuqui toj, tijicñ_Λayetla. Jini cha'an mach la' cha'len b_Λq'uen che' mi' cha'leñob b_Λc'tesaya. Mach la' mel la' pusic'al.

¹⁵ Pero ch_Λn yumanla Cristo ti la' pusic'al. Yom chajp_Λabil la' pusic'al ti pejtelel ora cha'an mi la' suben la' pi'Λlob baqui tilem la' pijtaya che' mi' c'ajtibeñetla. Subenla ti uts b_Λ t'an yic'ot c'uxbiya.

¹⁶ Ajñenla ti uts'at cha'an ma'anic mi' tejchel t'an ti la' pusic'al. Che' jini mi caj i yubiñob quisin la' contrajob mu' b_Λ i p_Λq'uetla ti jontolil, che' mi' q'uelob wen b_Λ la' melbal ti Cristo.

¹⁷ Mi yom Dios mi la cubin wocol, ña'tanla uts'at mi la cubin cha'an wen b_Λ lac melbal, mach cha'anic jontolil.

18 Come Cristo ja'el ti junyajlel tsi' yubi wocol cha'an mulil. Jini Toj bΛ tsi' yΛc'Λ i bΛ ti chΛmel cha'an jini mach bΛ tojobic, cha'an mi' pΛyonla ti' tojlel Dios. IsujmΛch tsa' tsΛnsΛnti ti' bΛc'tal, pero tsa' cha' cuxtiyi ti jini espíritu.

19 Yic'ot i yespíritu tsa' majli Cristo i subeñob t'an jini ch'ujlelΛlob ya' ti' yajñib chΛmeño' bΛ.

20 JiñobΛch sajtemo' bΛ mach bΛ anic tsi' jac'Λyob ti yambΛ ora, che' jal tsi' cha'le pijt Dios ti' yorajlel Noé che' bΛ woli to i mel colem barco. WaxΛctiquil jach tsa' coliyob ti ja'.

21 Jiñach i yejtal bajche' mi laj coltΛntel wΛle ti ch'Λm ja'. Ma'anic mi' poc loq'uel i lumil lac pΛchΛlel, pero mi' pΛsonla ti sac ti' wut Dios che' ñΛch'Λl lac pusic'al cha'an tsa' lac subu lac bΛ ti' tojlel Dios. Tsa'ix tejchiyonla ch'ojyel yic'ot Jesu-cristo.

22 Tsa'ix majli ti panchan ya' ti' ñoj Dios. Jini ángelob yic'ot yumΛlob, yic'ot año' bΛ i p'ΛtlΛlel, mi' yumañob Jesús.

4

Ts'ΛcΛyom mi la' pΛs i yutslel i pusic'al Dios

1 Cristo tsi' ñusa wocol ti' bΛc'tal cha'añonla. Jini cha'an yom chajpΛbil la' pusic'al cha'an mi la' ñusan wocol ja'el che' bajche' Cristo. Come majqui jach tsi' ñusa wocol ti' bΛc'tal tsa'ix i cΛyΛ i mul.

2 Ma'anix mi' chΛn jac' i colosojlel i pusic'al che' bajche' yaño' bΛ. Mi' cΛy tsucul bΛ i pusic'al cha'an mi' mel bajche' yom Dios ti pejtelel i jabil.

3 Come jasΛlix jini q'uin tac tsa' bΛ la' ñusa ti' melol mulil che' bajche' jini sajtemo' bΛ mu' bΛ i jac'ob i colosojlel i pusic'al yic'ot i ts'i'lel. Mi'

cha'leñob chuqui jisil yic'ot yac'ajel yic'ot leco b_Λ q'uiñijel, yic'ot lemoñel. Mi' melob leco b_Λ i q'uiñilel dios tac.

⁴ Mi' toj sajtelob i pusic'al cha'an ma'anix woli la' tsajcañob ti jontolil. Mi' p'ajetla.

⁵ Pero mi caj i tojob yic'ot Dios mu' b_Λ caj i mel jini cuxulo' b_Λ yic'ot jini ch_Λmeño' b_Λ.

⁶ Jini cha'an ti wajali tsa' subentiyob jini wen t'an jini tsa' b_Λ ch_Λmiyob. Tsa' jis_Λntiyob i b_Λc'tal che' bajche' mi' ch_Λmelob pejtelel winicob x'ixicob, cha'an cuxul mi' yajñelob ti espíritu che' bajche' Dios.

⁷ L_Λc'Λlix i jilibal pejtelel chuqui tac an. Jini cha'an yom mi la' wen ña'tan pañimil. Ch_Λc_Λ q'uele la' b_Λ, cha'lenla oración.

⁸ Yom mi la' wen c'uxbin la' b_Λ. Jiñ_Λch ñumen ñuc b_Λ, come che' mi laj c'uxbin lac pi'lob mi laj cuch cab_Λl mulil.

⁹ M_Λc'lan la' pi'lob. Mach yomic mi la' caj ti wulwul t'an.

¹⁰ Dios tsi' y_Λq'ueyetla la' c'Λjñibal ti jujuntiquiletla ti' yutslel i pusic'al cha'an mi la' coltan la' pi'lob, cha'an mi' tajob i wenlel ti Dios ja'el yic'ot i c'Λjñibal ti chajp ti chajp.

¹¹ Majqui jach mi' cha'len t'an, la' i cha'len t'an che' bajche' c_Λntes_Λbil ti' t'an Dios. Majqui jach mi' coltan i pi'lob, la' i coltañob yic'ot i p'at_Λlel mu' b_Λ i y_Λq'uen Dios, cha'an mi' tsictiyel i ñucllel Dios ti Jesucristo ti pejtelel chuqui mi' yujtel. La' tsictiyic i ñucllel yic'ot i p'at_Λlel ti pejtelel ora. Amén.

La' i cuchob wocol xñopt'añob

¹² C'uxbibilet b_Λ la, mach yomic mi' toj sajtel la' pusic'al che' mi' tilel i yil_Λbentel la' pusic'al che' bajche' c'ajc. Mach yomic leco mi la' q'uel.

¹³ Tijicñesan la' pusic'al come woli la' taj wocol che' bajche' Cristo, cha'an c'ax tijicña mi la' wubin che' mi' tsictiyel i ñuclél Cristo.

¹⁴ Mi woli la' w_Λlental cha'an i c'aba' Cristo, tijicñayetla, come woli' yajñel ti la' pusic'al i yEspíritu Dios am b_Λ i ñuclél. Isujm woli' ts'a'leñob Dios jini winicob pero jatetla woli la' ñuq'uesan.

¹⁵ Che' jini, mach yomic mi la' lon taj wocol ti' melol mulil, mi ts_Λnsa, mi xujch' mi i ñus_Λntel mandar, mi yamb_Λ jontolil. Mach yomic mi la' wotsan la' b_Λ ba' mach la' wentajic.

¹⁶ Mi an majch mi' yubin wocol cha'an ti' ñopol Cristo, mach i cha'len quisin. La' i sub ti ñuc Dios cha'an woli' colt_Λntel ti Cristo.

¹⁷ Come i yorajlelix mi' melob i b_Λ i cha'año' b_Λ Dios. Mi ñaxan mi' melonla, ¿bajche' mi caj i yujtelob jini mach b_Λ anic mi' jac'ob i wen t'an Dios?

¹⁸ Mi wocol mi' colt_Λntelob jini toj b_Λ winicob, ¿bajche' mi caj i yujtelob jini xñusa t'año' yic'ot xmulilob?

¹⁹ Jini cha'an, la' i melob chuqui uts'at jini mu' b_Λ i yubiño' wocol che' bajche' yom Dios. La' i y_Λc'ob i b_Λ ti' c' _Λb Dios, jini xuc'ul b_Λ Xmel pañimil.

5

C_Λntanla i cha'año' b_Λ Dios

¹ Testigojon cha'an tsi' ñusa wocol Cristo. Mi caj c_Λq'uentel c ñuclél yic'ot Cristo che' mi' tsictiyel.

Ti wocol t'an mic subeñob ancianojob ti la' tojlel, come ancianojon ja'el:

² C_Λantanla i tiñ_Λame' Dios año' b_Λ ti la' wenta. Mach cha'anic xic'bebiletla, pero ti pejtelel la' pusic'al che' bajche' yom Dios. Mach cha'anic ganar, pero cha'an che' yom la' pusic'al.

³ Mach yomic mi la' chañ'esan la' b_Λ ti' tojlel jini tiñ_Λame' año' b_Λ ti la' wenta. P_Λsbeñob ti la' melbal bajche' yom mi' melob.

⁴ Che' mi' tsictiyel jini ñ_{uc} b_Λ X_canta tiñ_Λame', mi caj la' w_Λq'uentel corona i yejtal b_Λ la' ñ_ucl_{el} mach b_Λ anic mi' jilel.

⁵ Che' ja'el, ch'iton winicob, ac'Λ la' b_Λ ti' wenta ancianojob. Ti la' pejtelel ch_Λn mele la' b_Λ ti pec' ti' tojlel la' pi'Λlob, come Dios mi' contrajin jini mu' b_Λ i chañ'esan i b_Λ. Mi' y_Λq'uen i yutsl_{el} i pusic'al jini mu' b_Λ i peq'uesan i b_Λ.

⁶ Ac'Λ la' b_Λ ti pec' ti p'Λt_Λ b_Λ i c'Λb Dios, cha'an mi' y_Λq'ueñetla la' ñ_ucl_{el} che' ti' yorajlel.

⁷ Ac'Λ ti' wenta Dios pejtelel la' c'oj'ol, come woli' c_Λantañetla.

⁸ Ña'tanla pañimil. Ch_Λc_Λ q'uele la' b_Λ, come jini xiba, jini la' contra, woli ti pam ñ_umel che' bajche' colem bajlum woli b_Λ ti jujuj t'an. Woli' chijtan i colojm cha'an mi' c'ux.

⁹ Cha'lenla wersa ti' contra xiba. Xuc'ul yom la' pusic'al ti Dios. Ña'tanla lajal woli' yubiñob wocol la' wermanojob ti pejtelel pañimil.

¹⁰ Dios am b_Λ cab_Λ i yutsl_{el} i pusic'al tsi' p_Λy_Λyetla cha'an temel mi la' wajñel yic'ot Cristo ti' ñ_ucl_{el} i yum_Λntel mach b_Λ anic mi' jilel. Che' b_Λ tsa'ix la' jumuc' ñ_usa wocol, mi caj i ñ_uq'uesan la'

pusic'al ya' ti' tojlel. Mi caj i xuc'chocoñetla, mi caj i p'at'esañetla.

¹¹ La' tsictiyic i ñucllel yic'ot i p'at'alel ti pejtelel ora. Amén.

Cortesía tac

¹² Tsac mele al jun cha'añetla ti' c'ab la quermano Silvano, xuc'ul b_Λ mij q'uel. Tsac ts'ijba jun cha'an mic xic'beñetla, yic'ot ja'el cha'an mi c'ac' ti c'ajñel jini isujm b_Λ i yutslel i pusic'al Dios ba' c'ay'letla.

¹³ Jini xñopt'añob mu' b_Λ i tempañob i b_Λ ya' ti Babilonia, tem yajc'abilo' b_Λ la' wic'ot, mi' y'aq'ueñetla cortesía, yic'ot ja'el calobil Marcos.

¹⁴ Aq'uen la' b_Λ cortesía. C'uxbin la' b_Λ ti uts'at. La' aq'uentiquetla i ñ'ach't'alel la' pusic'al pejtel añet b_Λ la ti Cristo.

I T'an Dios
Bible without Deuterocanon in Chol Tumbala; ctu
(MX:ctu:Chol)

copyright © 1977 Wycliffe Bible Translators, Inc.

Language: Chol

Translation by: Wycliffe Bible Translators, Inc.

Chol, Tumbalá [ctu], Mexico

Copyright Information

© 1977, Bible League International

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Chol

© 1977, Bible League International

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

45de077a-5b47-572a-bd9d-72438a3be945